

## 7. *Pilophorus scutellaris* Reut.

*Diagn.:* Oblongus, laete cinnamomeus, nitidus, subglaber; scutelli parte apicali nigricante, basi utrinque puncto niveo-squamoso ornata, disco in cumulum cinnamomeum alte convexum surgente; hemielytris obscurius cinnamomeis, opacis, fasciis duabus niveo-squamosis ornatis, pone fasciam secundam tota latitudine nigro-piceis, nitidis, fascia anteriore ad clavum interrupta, posteriore integra per clavum recte continuata; abdomine apicem versus late nigro-piceo, ventre utrinque ante medium fascia obliqua niveo-squamosa; capite subaequelateraliter triangulari; antennarum articulo secundo nigro-fusco; versus apicem sensim incrassato. Long.  $4\frac{2}{3}$  mm.

*Hab.* in Tunisia (Teboursouk!), D. Lethierry (Mus. Paris.).

*Descr.:* *P. cinnamoptero* Kirschb. affinis, corpore magis nitido aliter colorato mox distinguendus, ab omnibus structura insigni scutelli divergens. Caput subaequelateraliter triangulare, ab antico visum basi pronoti circiter  $\frac{1}{3}$  angustius, cinnamomeum, nitidum, margine verticis fuscescente. Rostrum coxas posticas attingens, piceum. Antennae articulo primo cinnamomeo, secundo nigro-fusco, margini basali pronoti aequae longo, versus apicem sensim sat leviter incrassato (ultimi desunt). Pronotum cinnamomeum, nitidum, latitudine basali circiter  $\frac{1}{4}$  brevius, lateribus leviter sinuatis, disco versus apicem fortiter convexo-declivi, transversim obsolete rugoso. Scutellum parte basali declivi, cinnamomea, apicali nigricante, disco ante medium in cumulum cinnamomeum surgente, apicem versus horizontali. Hemielytra fascia anteriore mox pone partem tertiam basalem, posteriore paullo ante partem tertiam apicalem posita; membrana nigro-fuliginosa. Pedes cinnamomei, tibiis apicem versus fuscescentes.